

Риёзус солиҳийн шарҳи / Ҳаё ва унинг фазилати ҳамда у билан хулқланишга одатланмоққа тарғиб қилиш ҳақида / 1516-ҳадис

1516 - عَنْ أُسَامَةَ بْنِ زَيْدٍ رَضِيَ اللَّهُ عَنْهُمَا قَالَ: قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ: «مَنْ صُنِعَ إِلَيْهِ مَعْرُوفٌ، فَقَالَ لِفَاعِلِهِ: جَزَاكَ اللَّهُ خَيْرًا فَقَدْ أَبْلَغَ فِي الثَّنَاءِ» رَوَاهُ التِّرْمِذِيُّ وَقَالَ: حَدِيثٌ حَسَنٌ صَحِيحٌ [2035].

1516. Усома ибн Зайд розияллоҳу анҳудан ривоят қилинади:

«Расулуллоҳ соллаллоҳу алайҳи васаллам: «Яхшилик қилинган киши яхшилик қилган кишига «Жазааакаллоҳу хойрон» (Аллоҳ сизни яхшиликлар ила мукофотласин) деса, раҳматни камолига етказибди», дедилар».

Имом Термизий ривоят қилиб, ҳасан, саҳиҳ ҳадис, дедилар.

Шарҳ: Инсон ўзига қилинган яхшиликка чиройли шаклда миннатдорчилик билдириб, раҳмат айтиши керак. Бундай қилишни бизларга ўргатган Расули Акрам: “Инсонларга миннатдорчилик билдирмаган Аллоҳга ҳам шукр қилмайди”, деб айтганлар (Абу Довуд ва Термизий ривояти).

Қалби кенг олийжаноб кишилар олган ҳадяларига ундан ҳам яхшироқ қилиб қайтариш орқали ташаккурларини изҳор қиладилар. Пайғамбаримиз соллаллоҳу алайҳи васаллам яхшилик қилган кимсага ундан ҳам яхшироқ қилиб қайтаришнинг йўлини ўргатиб, у инсонга «Жазокаллоҳу хойрон», яъни «Аллоҳ сизни яхшиликлар ила мукофотласин» деб айтишни тавсия қилганлар. Бундай дуо қилган кимса қаршидаги инсонга: «Сен менга шундай яхшилик қилдингки, менинг ундан яхшироқ қилиб қайтаришга кучим етмайди. Сенинг бу яхшилигингни Аллоҳ қайтара олади холос. Шунинг учун сени Аллоҳ мукофотлантиришини тилайман», деб айтади.



HADIS.ISLOM.UZ
NUBUVVAT MARVARIDLARI